



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Himalayan front nung China den tensa mejungi lir: Jaishankar

Khan okadaki orr aliba mapang police temi par ki meita ao



VOL. XX NO. 156 (ADOK 156) DIMAPUR AMUNGNÜ (SUNDAY)

METSÜREMI (MARCH) 19, 2023

₹ 5.00

Changki yim anasa gari lendong nung tasü mang 2 angu

Mokokchung, March 18 (TYO): March 16, anepdang 8:10 ako meta shi süir Changki yim anasa Tata Gari ka lenküpokleni ft 200 shi luagi yangji mi agi rongseter aliba tebur tain ka temang aser kumb 23 shi tebur ka temang ngutet.

Bushitsü dangba mapang nung nisung temesen ka aser nisung temang shilemtem ishika ngutet saka mi agi rongsar asüba ajanga tetsür asü tebur temang aji mejangjateter. Iba lendong nung yiruba nisung kabo temang reprangtsü asoshi mozüki bushia bener ogo. Gari nungji mi tuluka adoka rongsa aliba rescue team-i remseptet.

Iba Tata Gari ya Dimapuri nung Tuensang-i FCI jang bener aorba liasü ta jangjaogo. Rangajan

District-Golaghat Assam nung tebur 1, tetsür 1 aser tanur 1 ta atuagi amenba bushitsü dangba mapang nung jangjaogo.

Iba gar lendong nung asürtem temang aser shi melangji Imkongliba Memorial District Hospital Mokokchung-i Post-Mortem atema benerogo aser iba tatalokba dak ajemdaker bushitsü dangba asoshi Mangkolemba Police Station nung Case ka register süogo.

Iba tatalokba nung tasürtem kinünger, medemer aser metetteper lira Officer In Charge, Mangkolemba Police Station (763085682) nung tongteprateptsü asoshi Addl. Superintendent of Police & PRO ajanga sangdong ka nung metetdaksü.

Chief Secretary-i AHoDs aser HoDs den senden amen

Dimapur, March 18, 2023 (TYO): Nagaland Chief Secretary J. Alam, IAS lenisüba kübok Administrative Heads of Departments aser Heads of Departments senden ka menogo.

Senden nung Chief Secretary Alam-i AHoDs aser HoDs dang nendaka inyaktüsü aser pei pei staff indang attendance nung tenük yoktsü metetdaksü.

March 20 nungi 28, 2023 tashi 14 buba Nagaland

Legislative Assembly indang Mezü ngbuba Session amentsü lir anungji AHoDs aser HoDs ajaki session nung adentsü aser Minister o Advisor tem yaritsü atema officers gallery nung teti alitsü atema Chief Secretary-isa metetdaksü.

Senden nung Home Commissioner-ia G20 sentong atema maparen inyakba osang lemsatet aser tekaratiba nung sentong agitsüba tesemtem nung mapa tembangtsü metetdaksü.

Nagaland nung malaria samatsüba senden amen

Dimapur, Mach 18, 2023 (TYO): March 18, 2023 nü Niathu Resort, Chumoukidima nung Intensified Malaria Elimination Project-2 (IMEP-2) NCVBDC indang senden ka menogo.

Iba senden nung Health & Family Welfare Minister P. Paiwang Konyak-i o jembidang National Vector Borne Control Program-i Nagaland nung malaria samatsütsü atema mapa tajung inyaka arudar ta ashi.

2005 nungi 2022 tsü ngda Malaria agi nisung 185 süogo saka global fund aser Directorate of National Centre for Vector Borne Disease Control, Government of India teyaritem ajanga Nagaland nung malaria agi shirangertem ajema kümdaktsüogo, ta pai ashi.

Tesüiba küm asem tsü ngda Mokokchung, Longleng aser Zunheboto nung malaria putetba osang ka danga maliasü aser 2022 küm district 16 nungi 7 nung malaria agi shiranger meputet, ta Minister Paiwang-isa ashi.

Nagaland nung Japanese Encephalitis (JE) aser dengue tashidaktem putetogo aser 2015 küm dengue agi nisung ka asü aser 2022 nung JE agi nisung 2 asü.

India sorkar aser Ministry of

Health & Family Welfare ajanga Nagaland nem akokba tashi teyari agitsütsüla aser state department-ia küm küma alitsüla aser mapang shitak nung shirangertem puteta anepalutsüla, ta Minister Paiwang-isa metetdaksü.

Nagaland nung tesüsabuba regional meeting ji 2016 nung ayonga amen anungji tang ano iba senden ayongba atema pelar ta Commissioner & Secretary, Health & Family Welfare, Y. Kikheto Sema-ia ashi.

Union Health Minister, J.P. Nadda-i 2016 küm malaria elimination programme tenzüksü aser 2030 tashi nung malaria samatsütsü atema merangdang asenok tsü ngda amalitep alitsüla, ta Kikheto Sema-isa ashi.

Iba senden nung Director NCVBDC, MoHFW, GoI Dr. Tanu Jain, Joint Secretary (VBD), MoHFW, GoI Rajiv Manjhi aser Additional Secretary & Mission Director (NHM) MoHFW, GoI Roli Singh nungeria o jembi.

Senden nung mendenji Health & Family Welfare Principal Director Dr. Vibeitunuo M. Sachu liasü aser Mission Director NHM Dr. Ritu Thurr-i anküp tepela o jembi.

Nagaland sorkari ULB election indang jangjashitsür NMA 2001 nungi ali aser kiojen nung tax agiba agienogo

Dimapur, March 18, 2023 (TYO): Nagaland sorkari Urban Local Body (ULB) election agitsü osang sangoktsüba sülen telok aikati ULB election magitsüla ta ola adoka aruba mapang ka nung Honibarnü state sorkari iba osang jangjashitsüogo.

ULB election agitsü baji Nagaland state sorkar indang teinyaktsü ka lir aser Supreme Court-i aiben iba ken o angadanga aruba sülen ULB election agitsü tetuyuba agitsüogo.

"Constitution indang 74th amendment ajanga ULB nung tetsür nem 33% lemzüksür aser iba nung ajemdaker Nagaland nung ULB elections agitsüla" ta Supreme Court-i metetdaksüogo.

Supreme Court-i tuyuba ama State Election Commission-i May 16, 2023 nü ULB election agitsü sangdong agitsü.

NMA (3rd amendment) Act

2016 ajanga Nagaland Municipal Act (NMA) 2001 nung ali aser kiojen nung tax agitsüba arrla agienogo ta Municipal Affairs Department (MAD)-i tanü sangdong ka nung ashi.

"Nagaland Municipal Act 2001 nung ali aser kiojen nung tax dak sendakba arrla ajak mamshitsü (omitted)" ta NMA section 120(1) yanglushiba nung lir ta Department-isa metetdaksü.

Telok kari "omitted" melena "deleted" ta enoktsü mepishir saka Municipal Affairs Department (MAD)-i "omission, omitted & deleted" ajak ya ozü ngren tsütsü kasa tetezü lir ta jangjashitsüogo.

ULBs nung tetsürtem nem ward sasep nung 33% masü saka voting rights den tetsürtem shimoktsü asü ngdangbaji Supreme Court magizük, ta parnokisa ashi.

NMA 2001 nung Section 23B

nung ULBs chairpersons atema tetsür nem shilem lemzüksüba indang yanglushia lir aser kasa inyakyimtsü atema ULBs indang alphabetical order nung ajemdaktsü ta Municipal Affairs Department-isa metetdaksü.

"Nagaland nung ULB election agitsü sentong renema aliba ama agitsü aser lateta aliba mapang tsü ngda maparen ajak tembangtsüla. State Election Commission aser sorkari election tiptema agitsü atema mapa inyaktüsüla aser bangdakpur mesüra senso kari danga ozü ng alema inyakra, ibaji Supreme Court tetuyuba anema inyakba ama zü ngshitsü" ta Supreme Court-i March 14, 2023 nü obendang agitsüba nung shia lir.

ULB election maparen tembangtsü atema Supreme Court-i iba ken o May 18, 2023 nü angadangtsü.

Nagaland Police-i Cyber Crime Volunteer Framework indang metetdaksür

Dimapur, March 18, 2023 (TYO): Linük nung cybercrime khuret azüoktsü aser agientsü atema Ministry of Home Affairs (MHA) indang Indian Cyber Crime Coordination Centre (I4C) ajanga Cyber Crime Volunteer Framework ka yangluogo ta Nagaland Police-i Honibarnü metetdaksü.

Sensotemi cyber crime azüokba nung shilem agitsü atema Cyber Crime Volunteer

Framework lapok aser iba ajanga sensotem longjemer loktiliba tenzüksü nü kjidong lir ta Nagaland Police-isa ashi.

"National Cybercrime Reporting Portal (NCRP)" (www.cybercrime.gov.in) nung India senso mashii kati "Cyber Volunteer" ama tenü ng züluoktsü akok. Iba website nung "Register as a Volunteer" tab nung anemba sülen tenü ng züluokba maparen inyaktetsü.

"Cyber Volunteer" temi Nagaland ozü ng amertem tsü ngda apu ka ama shilem tajung agitettsü aser nü bortem nem osang prokshiba nung yariteptsü. Tanü cybercrime kanga bulua inyaktepba aser ano cybercriminals-i technology tasentem amshia mapa tamajung inyakba mapang ka nung public-i cybercrimes indang osang tejangja meteta alitsü tim, ta Nagaland Police-isa ashi.

NDPP-BJP-i NPF samatsütsü merang: Dr. Shürhozelie

Kohima, March 18, 2023 (TYO): Nagaland Assembly elections nung NDPP-BJP teloktepi NPF tamakok ngudaktsütsü merang ta NPF president Dr Shürhozelie Liezietsu-i tai tongloksü. Paisa election nung takok angur NPF MLA ya 'takok tulu angurtem' ta ashi.

Phek nungi NPF MLA Kuzholuzo Azo Nienu aser Bhandari nungi NPF MLA Achumbemo Kikon na nem tenü ngsang agitsüba sentong nung Dr Shürhozelie-i iba olen jembi.

"NPF-i election nung tetsükdaktsü aika ajuruogo aser sen agi dang election asayaogo" ta pai ashi.

"Tenü ng agi election agiba dak alaka political tangatetba kecha maliasü aser election manifesto ya nü bortem asoshi tetezü kecha mali. NDPP-BJP teloktepi ajanga Nagaland nung regional political party ka dang aliba- NPF tamakok ngudaktsütsü merang saka tetsükdaktsütem liaka ozü MLA anati takok nguogo anungji ni tena dang 'takok tulu angurtem' ta jaloktsür" ta Dr Shürhozelie-isa ashi.

Taküm assembly election nung political party 10 liasü aser parnok 9 tashi National political party tem liasü, ajisüka Regional

political party ka dang alibaji NPF liasü. NPF-i menden 2 nung dang takok angu saka iba asoshi tezü matangtsüla kechiyong NPF ya Naga loktiliba aser Naga lima nung tera yanga lir. Tanü ngba party ajakji belenshia aotsü" ta paisa metetdaksü.

MLA anati NPF asoshi jung tonga atang aser iba nungi asenok jenjang temabai atutsü, ta paisa ayongzük.

"Candidate tem jungjunga reprangdangba sülen parnok 22 nem dang ticket agitsü aser party-i senotsü agi yarira parnoki takok angutsü ta bilem, ajisüka NDPP-BJP teloktepi Nagaland nung regional political party ka dang aliba samatsütsü atema sentong tulu renema liasü" ta NPF president-i ashi.

Election ya küm pungu shia agitsü aser Legislative Assembly zü ngsemtem melener saka party bo temelenshi kecha makai dang aotsü ta paisa shisem.

"NDPP-BJP teloktepi indang honeymoon mapang tembangba sülen asenoki maongka kar angutsü aser idangji asenoki tangartem asen telok nung pelashishia agizükba mapang ajurutsü" ta Dr Shürhozelie-isa ayongzük.

"NPF tejen medemer aika maongka bushia ao saka parnok karbo tejaklen mesüra tesülenia moutet lir. Anungji asenok parnok

kidangi meyipa shilangang ta jaoktsü akok saka tang aritepabo mejali" ta paisa ashi.

NPF Legislature Party Leader Kuzholuzo Nienu-ia zü ngsem ajak dang ajemalua tamakok agizüktsü aser menden ana nung dang takok anguba atema tezü matangtsü ayongzük.

"NPF lennirtem aser zü ngsemtemi Dr Shürhozelie Liezietsu lenisüba kübok party asentenshitsü atema ayongzük" ta paisa ashi.

"NPF ya Naga nung er meyong party ka lir aser NPF ticket amer tokteperitem ya Naga nung er meimertem lir. Tasütaitemi dang NPF tenü ng tokteptsü lemtet" ta NPF legislature whip & secretary general Achumbemo Kikon-ia ashi.

NPF ya tashitait regional party ka lir aser 1964 nungi 2023 tashi election nung 'nil' khien danga mengudang, ta paisa ashi.

"Assembly nung kü den MLA Azo-i party tenü ng noktaktsü aser Naga nung er tementem aser khurettem atema ola adoktsü" ta Achumbemo-isa ashi.

"Party tem arur aotsü saka parnok ya Naga nung er party tem ta ashitsü makok kechiyong Naga nung er atema teshimtet party ji NPF dang lir" ta NPF Manipur state unit president and Minister Awangbow Newmai-ia ashi.

Imkong L. Imchen tenüngsang agütsüba sentong agi



Imkong L. Imchen-i ponguben atonga election nung takok anguba asoshi tenüngsang agütsüba sentong ka Community Hall, Mangmetong Village nung March 18, 2023 nü agidang tangokba noksa ka nung pai o jembiba angur.

Dimapur, Metsüremi/March 18 (TYO): Imkong L. Imchen ponguben atonga election nung takok anguba asoshi tenüngsang agütsüba sentong ka March 18, 2023 nü Community Hall, Mangmetong yimdak agia liasü.

Iba sentong nung jembidang, 28 Koridang AC nung nüburtemi kümsük pongububa asoshi pa shimba atema politician tejen, Imkong L. Imchen-i pelaba lemsatepa liasü.

Takok anguba ya pa kisüing atema masü saka constituency nübur ajunga atema lir, ta pai

ashier par taso yim (Mangmetong) nung nüburtemi pei atema mebilemi aser anibelem mesasai pa yariba atema alakteta pelaba lemsatema liasü.

Tsüngremi molamushia moatsüba atema pelaba lemsatepdang, Tsüngrem sentong ya jangratemtsüka lir, kechiaser Pai Mangmetong nübur dang lungjema yimjung nung alitsü jembiba aser iba telungjem nung Tsüngrem adenba ajanga asenoki takok angu, ta Imkong-i ashi.

Iba sentong nung Mangmetong A Khel Senso

Mungdang, Mangmetong B Khel Senso Mungdang, Village Council Sattsu, Mangmetong Senso Telongjem, Mokokchung, Kohima, Dimapur aser Mangmetong Village Council nungi tepela o jembiba liasü.

Mangmetong Baptist Church (MBC) choir aser Mangmetong Students' Union ajanga temeja ken aten aser Chuchang Imchen, Deacon (MBC) ajanga sentong tenzüka sarasadema liasü.

Iba sentong nung Rev. Tekai Tsüngrem o jembiba aser Dr. I. Lolen, Pastor (MBC) sentong nung menden liasü.

PIB Kohima ajanga media workshop ayongzük



Kohima, Metsüremi/March 18 (TYO): Press Information Bureau (PIB), Kohima, Ministry of Information & Broadcasting, Government of India ajanga "Skill India Mission & Digital India Mission" omen nung ajemdaker media workshop "Vartalap" ka Hotel Japfu, Kohima nung Honibarnü ayongzüka liasü.

Iba sentong nung tesemdanger tongti ka ama jembidang, PMKVY ya Central sorkari mapa inyaktüsü mashi alirtem dang mapa sayutsü aser skilled worker tem tali tajungba angazükdakja timba aayangtsü asoshi tenzüik, ta Kovi Meyase, Director, Department of Employment, Skill Development & Entrepreneurship, Government of Nagaland ajanga ashi.

State sorkari tang tashinung lanur 14,000 shi nem training agütsüoho aser item rongnung lanur 7000 dak tema nem placements agütsüogo, ta pai ashi.

Tawa Delhi nung state Chief Secretaries tem mungdang ka alidang state nungi multi-skill

programme ka atema shimtetba asoshi Union Ministry of Skill Development & Entrepreneurship dang pelaba lemsatepa liasü.

Iba workshop indang omen ya kanga tesutep lir, kechiaser skillng aser digitalization tsüingta lungjemdaksütsü jenti lir aser Digital India Mission ya 2015 küm digital literacy, digital infrastructure tajungba kumdaksütsü aser sorkar aser nübur tsüingta tepila ajemdaksütsü nükjidong nung tenzüik, ta Kovi Meyase-i ashi.

Iba sentong nung alakteta jaoker I Simon Teilia, Joint Director, Department of Information & Public Relations, Government of Nagaland ajanga jembidang, temelenshi arutsüsa media temi osang abentsüla, ta ashi.

Iba amala sentong indang nüburtem nem angatetdakja kidangi item osangtem bener arutsütsüla, ta pai ashi.

Assistant Director, PIB Kohima, K Sonikumar Singh-i iba sentong tenzüka jembidang, Central sorkar indang scheme aser project tem yanglua aser

mapa kuma inyakba nung dena aliba stakeholders aser osangbener tsüingta sensaksem akatsü asoshi sapang ka agütsütsü nükjidong nung iba workshop ya ayongzük, ta ashi.

Iba ama sapang ya ajanga osangbener nem scheme balala indang asüingdangyatsü aser tali angazüktsü maangka agütsür aser kasa mapang mapa kuma inyakba department temi mangatetba alibatem jangjatsür aser parnoki takok anguba lemsatepteter, ta pai ashi.

Iba sentong nung P Sophie, HoO Central Bureau of Communication, Kohima ajanga melepzüng o jembiba liasü. Iba workshop nung Department of Employment, Skill Development & Entrepreneurship nungi Zubemo Lotha Tsanglao, Deputy Director aser Menguzelie Suhu, Senior Instructor aser Department Information Technology & Communications nungi Ruokuovizo Chupuo, Sr Programme Officer aser Yanger Longkumer, Programme Officer nungertem shisalen sayur ama shilem agia liasü.

DDCF-i asükhu lemsateper

Dimapur, Metsüremi/March 18 (TYO): Kachari Tribal Council Nagaland tir Ramesh Hasnu anojungi March 18, 2023 nü asüba osang angashia aoksar, ta Dimapur District Citizens' Forum (DDCF) sangdong ka ajanga ashi.

Pa ya jembiba shidak inyakba aser temeimsü aketba nisung ka liasü. Pa asüba ya tanüla tajung ka samaogo. Pa asüba ajanga tawa adokdaksüba asüngtsü kanga tasak asütsü, ta sangdong

ajanga ashi. Pai lokti asoshi shilem tajung agiba ajanga nisung jenti ajangzük alitsü.

Mangyimer kibong den DDCF ajanga asükhu lemsateper aser Tulusang Tsüngremi mangyim mapang kinunger nem tashi aser anisüingzük agüjang ta sarasademtsür. Asür tanüla tesunep nung anisüingzükjangma, ta sangdong ajangasa ashi.

Tuli nung mi agi ki ka rongdok



Dimapur, Metsüremi/March 18 (TYO): Mokokchung district kübok Tuli nung Lukongmendang Ward nung aliba ki ya March 17, 2023 aonung mitsü kuma rongdok. Iba ki anasa aliba

sorochiokdak tesem ka tera rongdoka liasü.

Osang ajanga ashiba agi, iba mi ya short circuit nungi adok südi ta temolung melemi lir. Iba lendong nung asü-amaba osangbo mali.

Kohima College nung Yuba Ustav/Youth Festival agi

Dimapur, Metsüremi/March 18 (TYO): Kohima College, Kohima nung March 18, 2023 nü "Goal of Developed India" omen nung ajemdaker Yuva Ustav/Youth Festival agia liasü.

Iba benjongmung sentong ya Ministry of Youth Affairs & Sports, Govt. of India kübok Nehru Yuva Kendra Sangathan Kohima ajanga Kohima College, Kohima, District Administration aser District Culture Office Kohima, Department of Art & Culture, Government of Nagaland den lungjemer ayongzüka liasü.

Iba sentong nung tesemdanger tongti Addl. Secretary, Youth Resources & Sports, Anthony Ngullie liasü aser pai sentong nung jembidang, linük nung lanurtem lenla ajaklen sempet temaba jenjangi ajungkettsü atema Azadi Ka Amrit Mahotsav nung shilem ka ama Yuva Ustav ya amunger, ta ashi.

Anthony-isa India indang Ato Kilonser Narendra Modi-i benokba Panch Pran (nükjidong pongu) indang nung ajemdaker jembiba aser state nung kaketshir aser lanurtem dang pei sasa

aziöktsü, temolung agütsütsü, ochishia alitsü, ozüing sülen anidaksü, kati ka yaritsü aser linük meimtsü ajungshia liasü.

Iba sentong nung District Program Officer, District AIDS Prevention & Control Unit (DCPCU), Kohima NSACS, Sentimongla Tzüdir-i HIV/AIDS indang nung o tatsüka jembiba liasü.

Iba mapang lai inyaktüsü aser meinyaktüsü yimyatem lemsatep aser kaketshir dang kumdanga alitsü aser NSACS indang ABC guidelines sülen anidaksü ajungshia liasü.

Iba benjongmung nung painting, poetry, photography aser declamation nung tetoktepba agia liasü aser iba sülen sobaliba dak sendakba yimya balala nung shilem agia liasü.

Iba sentong nung General Secretary KCSC, Hyulo Tsela-i tarur pela agizükba o jembiba aser Account & Program Asst. NYKS, Ruokuovikho Chale-i Yuva Ustav indang rateta ashi.

Maneni tetoktepba balala nung takok angur nem Vice Principal, Kohima College, Kohima, Keneilesa Neikha-i sempet agüja liasü.

CRPF ajanga Civic Action Programme agi



Dimapur, Metsüremi/March 18 (TYO): School azüingertem saisapong nung temolung agütsütsü asoshi ajungmesotsü nükjidong nung 78 Bn, CRPF, Zubza ajanga March 18, 2023 nü Christian Mission School Sechu-Zubza nem Table Tennis board den tennis bat aser ball tem alia agütsü.

Item saisapong oset ya

Christian Mission School Sechu-Zubza indang School Management nem Honibarnü Civic Action Programme ka ayongzüka yangji agüja liasü.

Iba sentong nung 78 Bn, CRPF nungi ketdangsur aser sepaitem, Christian Mission School Sechu-Zubza indang tesayur aser kaketshirtem dena liasü.

Himalayan front nung China den tensa mejungi lir: Jaishankar



New Delhi, Metsüremi/ March 18 (Agencies): Ladakh kübok Himalaya anüolen tesemtem nung India aser China na tsüingda tensa mejungi lir aser tesem kar nungbo military forces tem kanga anasatepa tokja lir, ta Foreign Minister S Jaishankar-i Honibarnü ashi.

2020 küm tom nung linük ana tsüingda mangatetep adokba sülen seapi 24 tepseta liasü, ajisüaka diplomatic aser military sensaksem ayongzüka agiba sülen tensa aziüoka liasü.

December ita-a linük ana tsüingda anütoklen sector nung arrtsü tejangja maliba tesem nung mangatetep adok ajisüaka nisung takümbo mesama.

"Kü mulung nungbo tensa kodang raksatsü aji mejangja lir, kechiyong tesem kar nungbo sepaitem kanga anasatepa tokja lir anungji kanga lendong lir," ta Jaishankar-i India Today conclave ka nung ashi.

China indang Foreign Minister den 2020 küm September ita mulungtepba dak ajemdaker arrtsü ken o mebentetra India-China na tesendaktep ya akidang ama süngjema makümtsü, ta pai ashi. "China nungertemi mulungtepba ama inyaksüla, koba benoka inyaksangshitsü atema parnok timtema arudar," ta pai ashi.

Tesem aika nung linük anaprongla atsüingnaka tang tashi ken o mebenteti aliba

tesemtem nung sensaksem maneni agidar, ta Jaishankar-i ashi.

"Onoki China nunger dang mulungteper aliba nung aibelena tanungba tesendaktep ka kecha masü ama maneni bener motettsü ta jangja jangja metetdaksüogo," ta pai ashi.

Jaishankar-i ashiba agi, pai iba ita India nung G20 linük foreign minister tem senden amenba mapang China indang foreign minister tasenba, Qin Gang den arrtsü nung tensa indang sensaksemogo.

Taküm G20 tir mapa India-i abenba dak sendakba nung Jaishankar-i, alima ajungi agizüktettsüsa New Delhi-i forum ka tentettsü imlaba Jaishankar-i lemsatepa liasü.

"G20 ya olangtepba club ka mesüra global north indang tesem ka dang masütsüla. Alima ajunga tebilemtsü aiddaktsütsü nüngdaker. Onoki iba onük ya ajang ajanga benokogo," ta pai ashi.

Taoba hopta asem tsüingda G20 ministerial senden ana amenba mapang Russia-i Ukraine amakba indang tongtibangsa jimbiogo.

2024 kuma Modi sa PM akümtsü: Amit Shah

New Delhi, Metsüremi/ March (Agencies): Union Home Minister Amit Shah-i Hokolbarnü ashiba agi, BJP-i aniba NDA-i 2024 kuma sorkar kümtettsü aser Narendra Modi term asemubaba atonga Ato Kilonser akümtsü.

Delhi nung conclave ka nung shilem agiba mapang Shah-isa, Modi-i aniba sorkar kümtetba sülen linük kübok Jammu and Kashmir, Northeast aser Naxal ken o tuluba ka bentetogo, ta ashi.

Pakistan telung nung kiralongrartem amakba sülen bendanger tashi kechaia linük telung ken o nung jushitsü atema temulung moluteti kümogo, ta home minister-i ashi.

"Taruba PM shiba sädaktsütsü aji nüburtemi telemtetba agitsü. Ni linük nung tesem ajak semdangogo aser BJP-isa sorkar kümtettsü aser Modi term asemubaba atonga PM akümtsü ta asatetogo," ta pai ashi.

Shah-i ashiba agi, 1970s sülen tang mezüingbuba PM ka term asemubaba nüburtemi shimtsü.

2024 general elections nung NDA-i menden kwi akoktsü ta asüingdangba mapang minister-i ashiba agi, 2019 küm dang nungi menden timba akoktsü. "Onoki (BJP) menden 303 dak tema akoktsü," ta pai ashi.

2019 küm general election nung BJP-i menden 303 akok aser NDA-i Lok Sabha constituency 543 nungi menden 350 dak tema koka liasü.

2014 küm Modi-i aniba

sorkar mezüing tentetba mapang nisung crore 60 bank account maliasü, nisung crore 10 metsümeshidak maliasü aser nisung crore asem electricity connections maliasü, ta Shah-i ashi.

Aji dang masü alima nung tebilemtsü kar adokra alima lenirtemi Modi dak rangloker aser pai kechi bilemer aser amanger iba dak rangloker, ta paisa shisem.

Pai ashiba agi, Modi-i aniba sorkari COVID-19 wara kanga junga aziükogogo aser linük nung lisopurtem ajak nem kanga takok ngua vaccine agütsüogo.

Union home minister ama pa shilem indang asüingdangba mapang Shah-i, Jammu and Kashmir, Northeast aser Naxal agi kongshir aliba tesem tem nung tebilemtsütem tuluba bentetba atema pa kanga temulung asür, ta langzü.

Jammu and Kashmir nung aziütokshiba lendong shilem 70 aser Naxal agi konshir aliba tesemtem nung shilem 60 agi tajemba kümogo aser Northeast nung yimjung asoshi tenangzüktepba yanglur telungpurtem aika bendanga agtsüogo, ta pai ashi.

Iba dak alia Modi-i aniba sorkari Article 370 agintsüogo, Ram temple yanglu tenzükogogo aser Triple Talaq dak sendakba ken o bentetogo, ta pai ashi.

Jammu and Kashmir nung election kodang agitsü ta asüingdangba mapang home minister-i, election agitsü atema renemzükbaba mapang Election Commission-i telemtetba agitsü, ta langzü.

NIA-i PFI rongsen aruba lenmang shibangtsü

New Delhi, Metsüremi/ March 18 (Agencies): 2047 küm tashi nung India nung Islamic yimsüsüba amenoktsü nükjidong yur kin balala tsüingda telemidang adokdaksütsü atema tasa asaba atema NIA-i 2022 küm September ita PFI, iba telok lenirtem aser züingsemtem anema ken o ka benok.

National Investigation Agency (NIA)-i, tenokdangba agütsür aliba Popular Front of India (PFI) telok nungi lenir tejen 19 aitsüogo. Parnoki India mesüngjemteti kümdaktsütsü atema tasa asaba atema aitsüogo. Iba telok ya aziüktsü atema parnok senotsü aruba lenmang shibangtsütsü asoshi NIA-i PFI indang bank account 37 aser iba telok den sendaktepa aliba nisung 19 indang bank account 40 tamshi mejungi kümdaktsüogo. Guwahati, Chennai, New Delhi,

Jaipur, Bangalore, aser Hyderabad densema linük kübok yimti balala nung item bank account tem mamshi kümdaktsüogo.

Ken o bushisüingdangba sülen PFI puri tamangba yimsü dak ajemdaker linük lemdangtsütsü atema tasa asaba nguteta liasü, ta NIA-i ashi. Agency-isa, parnok nükjidong tongtibangtibaji India nung tang yimsüsüba yimya melenshia Sharia temzüng ozüing den Islamic Caliphate ka agi amenoktsü sentong liasü.

Ken o bushisüingdangba sülen iba telok yagi linük kübok tesem balala nung itasen agütsür ama parnok indang operatives aser weapons trainer tem nem senotsü teyari agütsüba nguteta liasü.

"PFI-i Muslim lanurtem anidena India sorkar anema prangbong hadir bener raratsü

sentong tatongi yanglur liasü. Item lanurtem ya PFI indang tebilemba aser tasa sülen anidaktsü atema meima tenangzüktepba agir liasü," ta agency-i ashi.

"Item nisungtem ya tangazükba shidak agütsür aliba PFI Army/militia anitettsü atema linük kübok tesem balala nung PFI-i ayongzüka agiba Arms Training Camp tem nung prangbong hadir balala amshitsü atema training agüja liasü. PFI-i Islamic Caliphate ka amenoktsü atema India temzüng ozüing kübok tentetba Indian Republic atsüingtoktsü atema rara raratsü asoshi parnok indang Army/militia anitettsü sentong yanglur liasü."

NIA-i aitsür alirtem ya IPC, Unlawful Activities (Prevention) Act, 1967, aser Arms Act, 1959 kübok section balala nung aitsü lir.

Amritpal Singh Jalandhar anasa police dang nungi jena ao

Chandigarh, Metsüremi/ March 18 (Agencies): Waris Punjab De tekolakba Amritpal Singh police dang nungi jena aoba sülen pa aputsü atema Punjab police-i Honibarnü meita aoba sentong ka ayongzükogogo.

Pa senzüa aliba convoy ya police temi Jalandhar kübok Mehatpur nung sota liasü. Iba sülen pa nem teyari agütsür trok police-i apu ajisüaka pa jena oteta liasü.

Kasa mapang nung Punjab nung Deobarnü tashi internet services shibangtsüogo.

"Nüburtem kümzüka toktsütsü atema Punjab kübok March 18 (12:00) nungi March 19 (12:00) nü tashi mobile internet service ajak, SMS service ajak (banking aser mobilen recharge dak alak) aser voice call dak alaka mobile network tem nung agütsüba dongle service ajak shibangja atatsü," ta Punjab indang department of home affairs & justice-i sangdong ka ajanga metetdaksü.

Taoba ita Singh

pusemertem shirnok dang Khalistan sympathiser ta ajar parnoki pa nem teyari agütsür ka apuba anema longkak ait aser police tem den mangatetep adoka liasü.

Iba sülen WPD activist tem ajak indang arms licenses magi kümdaktsütsü atema inyakyim tenzüker aser Amritpal Singh indang social media account handler Gur Aujla sota yua liasü.

Chamkaur Sahib nung alir Barinder Singh-i nisung pur aoba dak sendakba nung Singh anema tashishiba ka benokba sülen ken o ka benoka liasü. Iba ken o dak sendakba nung nisung 30 shi aija lir.

Amritpal, shiba taoba küm Dubai nungi India-i meyipa aruba sülen Khalistan indang yimjak nung jembia liasü, pai pa ya India lisopur ka ama mezüingshir ta ashi. India indang passport , koba pai ashiba agi, senzüsenpongtsü atema kuli kakat ka lir, iba ya abenba ajanga pa India nunger lisopur ka mekümdaktsür, ta Amritpal-i ashi.



New Delhi nung aliba Parliament House complex nung Rajya Sabha nung Leader of Opposition Mallikarjun Kharge aser taoba Congress President Sonia Gandhi na den tanga opposition MP temi Adani ken o atema lungkak aitba angur. (New Delhi, March 18)



TIR YIMYIM YIMOBILEM (EDITORIAL)

DIMAPUR AMUNGNÜ, METSÜREMI(MARCH) 19, 2022

Asentenshi nungdaker

Asenok shi temang dang masü saka tanüla tsütsüa süadoker aliba jenjang nungi Tsüngremi dang shia arudaktsütettsü. Asenoki Tsüngrem tenüng nung sentong aika yanglua akatsüa akok mesüra Tsüngrem asoshi mapa aika inyaksüa akok, saka asenok tanüla kümzüksü asoshibo mapa tajung aika inyakbaji masü saka Tsüngrem den tesendaktep shitak aliba jagiang kümzüksü. Kodangsa asenoki asenoksasa asen taküm aser kibong Tsüngrem den tesendaktep shitak mali ama bilemdir, idangji Habakkuk ainker ama, Tsüngrem dang ashitsüla. Tsüngrem den asenok tesendaktep junga mali, tanüla tsütsü kecha tejangraba mali akümba mapangji, asenok atema kanga lendong mapang lir. Idangjibo, asenoki sarasadema mesütettsü aser temulung nung tepela mali kümadoktsü. Idangji, asenoki Kibuba, onok dang koda sarasademtsü sayuang ta shia sarasadem tenzüksüla. Asenok mapang kabo sarasademba manentet sarasademba anogotema liasü. Asenok aikati Tsüngrem ain tashi amshia temenen tanüla aridokba aser aneptsüba mapatem inyak. Mapang kabo asenok tenük agia nisungtem rongnung tanüla temeshii mapa inyakba nguogo. Asenok aika tzü nung dang masü saka tanüla temeshi nung baptiba purtem lir. Ajisüaka, tanübo item tanüla temeshi tashi nung inyakba mapatem ajak to otsüang ka kümer, asenok taküm aser kibong aika tenüng agiang Khristan ashi, libaliro aser inyaksangshi ajak limapur ama kümogo. Asenoki taoba mapangtem jungjunga bilemdangra, mapang kabo aonung sentep nung dena menden agi makutsüsa nisungtem adenshia Tsüngrem külem aser ken tena sarasademba agi sentepa mesenshitet. Iba amaji tanüla temeshi tadenba asenokia meteta asenok den liasü. Tanübo asenok lokti sentep nungi iba tanüla temeshi tadenba tashi to kenyongi mali samaogo. Joko, pei kidang aser mapa inyakdak sarasadem masüabajibo yutsür, tenla kidanga sarasadem mesüner. Telok külemi sarasadem nung tesüsa sarasademmer mali tom nung lokti sarasadem anenadokba mapngji tang ya lir. Ibaji tanüla rusepba aser Tsüngrem den mejembinüba tamaitüsü lir. Habakkuk ainker mapang nunga nübortem tiaji tanü asenok ama, Tsüngrem nungi pilar aliba mapang ka liasü. Ibayongji, Habakkuk-i Tsüngrem dang par nübortem dang taochi sayuang ta sarasademba Habakkuk tapu 3 nung angur. Pai par nübortem dangi asentenshi yokang ta Tsüngrem dang kanga mepishi nungji, Tsüngremi pa den jembi aser Tsüngrem tejembibaji angashia pa kanga tsübuia liasü. Iba ama pei nübortem asoshi sarasademba agi Habakkuk tamang ulushi aser temeshi purtembo tamang agidang alitsü ta pai jungjunga angatet. Asenoki inyakba nung tejang matangtsüa akok, tamakok aser tesama tulu ajurutsüsa akok, ajisüaka nibo teti kibuba nung sanga dang pelaseta alitsü ta ashiba nisungji Habakkuk lir. Kasaji Yihusui par nübortem dang nenokbo kechi telok sülen onüdir oang aser kechi tsüngrem külemnüdir külemang, saka ni aser ozü kibongbo Kibubasa tenzüksü ta ashiba asenoki bilemtetter. Tanü kasa Yihusua aser Habakkuk nungertem mapang nung amato asenoka Tsüngremi asenok tesamatsüba tia nungi kümzükba ajakto amadoker, alima yimten tashi aser rongsenang tsüngrem kümdaktsür alir. Habakkuk 3:14 nung ashiba ama, tanü asenok pelatepba ola ya Tsüngrem tenüng asangba ola masü saka sensakertem akoksakdaktsütsüba olatem lir. Iba ama mapang nung asen lima aser nübortem asoshi Habakkuk-i sarasademba ama, Tsüngrem dang ain adoktsüba mapanga taochi sayuang aser alemli ama, ano khen, onok dangi yakta asentenshi yokang ta lumia sarasademtsübaji kija, kibong aser arogo nung kanga nungdaka kümogo. Khristan-bo Khristan saka Tsüngrem den tesendaktep mali, arogobo arogo saka tanüla temeshi tadenba kenyongi mali takong alitsübaji tezüdangtsüka lir. Tamang nung amangpetba tamaitüsü aji asütsü. Habakkuk-i ashi ama, kechi tensa ajurudir ajuruaka Tsüngrem den tesendaktep meraksai pelatepa alitsüsa amangtetbajiang jangratemtsüka lir. Iba tamang aser mapangji asenoki Tsüngrem dang meshidi.

OLEMSABANG

KODA ASÜTSÜ SUNDAY SCHOOL SHIBANGER

~ P. Renthly Jamir

(Yashi adok nungi...)

Anungji tamajung lenmang nungi, tenung tamajung agia Hon-Taribi aika rizüngdang nungibo Tsüngrem'er maongka tilaka agiba-ang kanga agi tajungba lir. "Rongsen tulu dang nungi tenung tajungang shimtetsüba; Hon aser taribi dang nungi maongka tajungba" (A.Shin-22:1). Ajisüaka, shirnoki Tsüngrem tsüngken tsübuia ochishia yimsü asür, shirnoki Tsüngremi mulungba ama taküm alir parnok asoshibo item temoatsütem ya agütsütsü Tsüngremi nangzüka lir. "Parnoki ki süa yangji nisung alitsü aser parnoki tsükmenatsü lu ayimtsü aser item sungjang achitsü. Tangar alitsü parnoki meyanglutsü, tangar achitsü parnoki metsünutsü, kechiyong sungdong arishi anogo ama kü nübur arishi alitsü, aser parnok teka agi inyakba mapa kü teshimtet puri tatem tonga agitsü. amajok nung parnoki mebelemtsü, mesura tesamatsü asoshi chirnur mesotentsü, kechiyong parnok Kibubai moatsürtem lir aser parnok chirnur parnok den alitsü (Isaia-65:21-23). Tsüngrem o-i ashir, "Ni ajanga chubatem chubar, aser yimsüsürtemi yimsü asür" (A.Shin-8:15-16). Anungji na chuba menden nung amenbaji Tsüngremi mendaktsü aser ne nem yimsüsütsü tashiji Tsüngremi agütsü sura, iba chuba menden nungjagi anizüksüa pa dak tashi ain lir ta metettsüla. Ano Tsüngrem o-i ashir, "Kechiaser yimlijji Kibuba meyong; aser kintem madak pai yimsü asür" (T.Ken-22:28).

Anungji Naga nunger madak yimsüsütsü asoshi shirnoksa, nüburtemi meyongnem agüja shimtetogo, parnok ajaki metettsübaji, nenok nem ketdangutsü tashi (Power) agütsüba bangdak mendenji ne sasa anguba masü, Tsüngremi maongka agütsüba menden ta angateter, ajemalua tila kümer, Tsüngrem tsüngken tsübuia ochishia yimsü asütsü tenzüksüla. Ano yimsüsürtemi metettsüba kanga tongtipang kaji, yimsüsürtemi nübur ola angatsüla, nübur taginuba metettsüla aser pei dang nungi linuk aser nüburji tongtipangba ta angateta yimsü asütsüla. Yimsüsürtemi nuktapangda japojarari nem taküm manisadaktsütsüla. Tsüngrem o-i ashir, "Ne tashi tetsür nem tagütsü; Mesura ne lenmangtem kobai chubatem samatsür" (A.Shin-31:3.b). Yimsüsürtemi chidiyungdi aser temesepba chiyungtsü nungi pilaa alitsüla, talisa yimsüsürtemi yi majemtsüla. Tsüngrem o-i ashir, "Oh Lemuel...Yi ajemtsü chubatem asoshi masü, aji chubatem asoshi masü; Mesura yimsüsürtemi temesepba yi mebushitsüla, ashiko parnoki ajemtsü aser ozüngji amatsü; Aser timtemer dang ochiba tsüa aliba meyipsatsütsü" (A.Shin-31:4-5). Massa chuba Lemuel dang tetsüi sayutsüngi o ashiba kanga tongtipang o ka lir. Samson ya Israel madak Obendanger ka asütsü asoshi tetsü nu-menden nung alidang nungi balaka shimtet, ajisüaka, kanga tesasatsüka, Samson-i nuktapangda japojarari nung mazüok aser chidiyungdia yi ajemba ajanga pa taküm alima nung otsüsutsü süa tansutsü-ka tesama tiai aiba asenoki laishiba nung angur. Samson ama tanü asen Naga lima nung yimsüsür lenirtem nuktapangda japojarari aser yi nem anisakdaktsür taküm lisaa aliba aika lir. Atangji, yimsüsürtemi chidiyungdi aser temesepba chiyungtsü achiba aser yi ajemba nungi pilaa alitsüla. Tanü asen lima majungba ya tanga kecha agi masü, saka yimtsüng level nungi shir state level nung yimsüsür tashi yi ajemer teimba, aser linuk meima ochishia yimsü masüba ajanga asen lima ya majunger. Election mapang yimsüsürtemi anir nutsüng nübur ajaki senyong pei temeden ayokba aser supokrem nem anisadaktsüba ajanga asen lima raksar. Ibayongji Election nung takok ngur külen yimsüsüa aodanga, Election nung endokba sentsüh menoktsü arishidang, linuk terenlok nungdem nung agütsüba sen nungi pei agitsü alozüka ayutsüsa akümer. Yimsüsür tatartem dang masü, Sorkar ketdangser tazüngpurtemi anir talakpur tashi, linuk terenlok atema aruba rongsen ochimashi amshiba ajanga asen lima ya merenloker aser nubortem tangutsü tim shitak mangur. Tanga ajakji toktsür, kaketshirtem Scholarship dena Center Sorkar nungi mapang shitak nung agütsür sernung, sorkar ketdangsertemi mapang shitak nung magütsüi aoita ayuba ya-a kanga tesasatsü-ka lir. Tsüngrem o-i ashir, "Chubai ochiba agi alimaji yanger, saka shibai sempet aser supokrem akhanger Tsüngremi aji atsüngdoker" (A.Shin-29:4).

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mayor Eric Adams-i New York City ya tamangba yimti kumdaktsüner

New York, Metsüremi/ March 18 (Agencies): New York City Mayor Eric Adams-i tasü ita pa Tsüngrem nisung ta sangdong aser iba yimti nung tamangba yimsü lenirtem dang iba yimti ya tamangba aser taneptsü anguba tesem ka kumdaktsüba nung pa den külemi inyaktsü ajungshi.



Mayor Eric Adams-i jembidang tangokba noksa nung angur.

"Asen kibong nung asenoki tamangba anioxtsüla. School tem nung nenoki tamangba yimsü indang masü saka cannabis (temesepba chiyongtsü) indang jembiba atema ni süngmanger. Ni süngmanger. Yangji temolung agütsütsü tongtipang ta asenoki mangatetba atema ni süngmanger," ta Adams-i Teachers College, Columbia University nung aliba International Interfaith Research Lab nung Brehostibarnü Mayor's Office of Faith-Based and Community Partnerships ajanga ayongzükba mental health faith-based summit ka nung ashi.

"Iba yongji Department of Education nung tanur ajaki kumdanga alitsü, tango sashitsü exercise agitsü ozüing benoka amshir."

Taoba hopta sentong ka nung Adams-i public school tem nungi sarasademba agienba ya aibelen lir ta sangdongba sülen tang pai iba o ya jembia liasü.

Eric Adams ya Khristan kibong ka nung soa inet saka nondenominational services nung timba adener aser pasasa pa Khristan ka ama ashir.

Pai Khristanpur pastor aser mental health professionals densema tamangba yimsü telok balala nungi adenshia alidak tanur asüding pai tamang akaba ajanga tensa tia balala nungi jembu, ta ashi.

"Nüburtemi ni kechiba tamangba yimsü nung kanga metaloker ta süngmanger. Tanur asüding ni timtem jenti ajuru aser ni ya Tsüngrem indang sayatenya ka lir. Aser iba

tanur New York yimti nung Mayor ka kumdaktsüba asoshi ni anogoshi tenüngsang agütsür. Tsüngrem ji adangji lir," ta pai pastor ama jembia liasü.

America nung lanurtem rongnung teimla makaba indang pai shisabolua ashi aser loktiliba nung tamangba yimsü samaba ajanga item ya ajurur, ta ashi.

"New York City nung kisüing masü saka America nung tanü kechi ataloker, iba atema ni tsüboa bilemer," ta pai ashi.

"Tanur asüding nu biology class nung scientific experiment ka agidanga liasü aser iba ya tajangshiba tamajung ka liasü. Saka ibaji tanü asenok aliba indang sayuba liasü. Iba experiment nung nai alo ka tzü tatsük nung yutsüba indang liasü aser idangjisa alo ya jokteta adok. Saka nai alo ji tzü temokong nung yutsür tanemi tzü tsükdaktsüra yangji pa letseta asür. Iba kasaji asen yimti aser linük nung tang ataloker," ta pai ashi.

"Asen tanurtem anogoshi saker school-i aodang store nung anena cannabis mezüa aliba gummy bears aser Skittles alir," ta pai ashi.

"Iba linük nung tetsür chanu temi social media nung soloka alir, temolung nung anisüngzük mangur, par tsürabortem dang arishi küm 12 aser 13 mapang temang melenshitsu atema surgery agitsü asüngdang. Arishi küm 9 aser 10 aser 11 tanurtem pei sasa asüba tali akumer. Asen tarutsü tamendak dak samaba asenoki

angur. Saka temperature kanga ajema lir. Instagram post ka, Twitter nung post ka aser Tiktok nung post ka aser asenoki aji tajung ama bilemer. Anogo ishika tejakdang arishi küm 14 tanur kati teyi dak kotari agi aiben atsüing. La arishi küm 15 dang lir," ta Adams-i ashi.

Aser America nung tamangba tsütsü ajema akumba ya Adams-i ashibaji shidak lir.

Pew Research Center ajanga National Public Opinion Reference Survey agiba nung America nung lanur tesadang ka dang tajembai anogoshi sarasadem, arogo züingsem maneni tajemba akumer, ta sayur.

Iba survey ya 2021 küm tatemlen adoktsü aser yangji US nung lanur shilem 45-i anogoshi sarasadem ta bushitet aser 2007 küm shilem 58 aser 2014 küm shilem 55-i anogoshi sarasadema liasü.

Shilem 32 shi kodanga sarasadem masü, koba US nung lanur shilem 29-i parnok tamangba yimsü balaka mali ta ashiba den anasatapa lir.

America nung tamangba yimsü balaka malir ya küm pongu tejakdang shilen trok agi tajemba liasü aser küm ter tejakdang shilem ter agi tajemba liasü.

"Aser nüburtemi küdang maneni asüngdang. Kechiba nai sarasademsü mapang lir ta shijen ashir? Ibai sarasademsü mapang lir," ta Adams-i ashi.

"Asen tebilemtsü ya rongsenketzung masü. Asen tebilemtsü ya tamangba yimsü lir. Nüburtem tamangba samaogo. Aser timtem nung aliba, dyslexic aketba, pua amshisang tanur ka nai agizüktetra aser tang paji New York yimti indang Mayor ka ama shimetra, iba yimti nung ibaji atalokdaktsütsü meranger. New York yimti indang mayor ya Tsüngrem chir lir. Aser iba atema ni tatok memeshitsü."

ANOGO ABEN TSÜNGREM DEN

Tenüngsang agütsüba osang T.Ken 73:1-28

Asaphi Tsüngrem indang pai amangba nung ochi shia nokdak, saka pa ajutok kechiaser pai kiyonger dak tenük yok aser tenük merem. Kechiba tamajunger azükaru ta pai süngmang. Kodang pai tenüng asangba sama, pa metsüdaktsü tenzük aser timatem. Pai meketa alir mereprangi azüklen repranga telangzüba bushitsüba liasü.

Asaphi tamajunger tatembangji metet. Tongtipang tasüngdangbaji "na kong lir?" ta masü saka "na kongi aor?" Nai tesatempa leman kong teraksa lir aji agir asü temesüba leman koba agi taküm dangi anir (t.20) aji agir. Ken züluri Tsüngrem dak reprang aser tengutetba kar angu. Mezüngbuba pa asenok den atentsü nangzükba asoshi asenoki Pa tenüng asangtsüla. Pa tenüng Imanuel, koba tetezü "Tsüngrem asenok den dena lir" (Matt. 1:23).

Tanabuba, asenok Pa teka agi sotta lir. Asenoki Tsüngrem teka ain teyagluba nung angur. Pa teka tanüki asenok tzü tasüngtet anasai aniba asenoki angur. Aser kangki Pa teka angenlokba aser asenok asoshi asüba angur.

Tasembuba, asenok Pa ozüing aniba asenoki angur. Tsüngremer ozüing aser tenyaba ajak asoshi lir, saka pai asenok kija shia metetta lir. Pai asenok nu menden nung alidang metet aser asenok Pai mulungba ama alitsü. Pai renemtsü. Mapang ka nung anogo ka dang liang aser mapang ka nung mera ka dang merang (A.Shin 4:18). Iba tajungshibaji Tsüngrem O nungi sarasadem nungi arur.

Tatempa, asenoki Pa kotak sentsüwangshi angutsü. Khristan ama asenoki asenok kotaki aotsü ta metet kechiaser Khristai iba jenjangji kangki nung angutsü (1Tesa. 5:10), Pai nangzük (Yn.14:2,3) aser Pai sarasadem (Yn. 17:24). Asenoki tanü ajakbo mangatetsü, saka tarutsü nung asenok sentsüwangshi lir (1 Peter 1:3,2; 2Peter 1:11; Fil. 4:4).

Khristan ka ama nai tenüngsangtsü aika lir. Tsüngrem ne den lir. Kodang alima ochi mashiba nung na teimla makai kümdir anenang,anüing len reprangang aser Tsüngrem temoatsütem asoshi Pa tenüng sangang.

Kentucky asentenshi sentong nung nisung 3,500 shi aden



Lexington, Metsüremi/ March 18 (Agencies): Asbury University tekulem sentong tanen makai agiba tembanger mapang tatsüka lir Kentucky nung asentenshi sentong ka agiba nung nisung 3,500 shi arua aden.

Minneapolis, Minnesota nung evangelist Nick Hall tekolakba sür lanurtem tiying

südaktsür aliba ministry, Pulse ajanga iba sentong ya February ita tatembangba Deobarnü Lexington nung Rupp Arena nung ayongzüka liasü.

Iba sentong nung nisung 3,500 shi aden, koba nikingdang 2:00 ako nungi 11:00 ako tashi agi, ta Pulse odongtari tan hopta The

Christian Post dangi yokba email nung shia liasü.

"Iba sentong ya khenyongi balaka liasü, kong tesem ka nung alirtem nikingdang lungjemdaktsü. Tanüla Temeshi agi mapa inyaka osangtajung teimla nung nisung takum melenshiba ngua onoka süngmang," ta odongtari ashi.

"Sayutsüngiba, tekulem mapang agiba, takum kuli ashiba aser sarasademba mapang tanüla jembiba liasü."

Pulse ajanga Texas Tech University, University of Georgia, North Dakota State University, Iowa State University, University of Minnesota, University of Wisconsin aser University of Michigan nung sentong balala ayonga agir mapang tatsüka tsüngta Lexington nung iba sentong ya ayongzüka liasü.

Iba telok yagi University of

Oklahoma nung aliba Gaylord Memorial Stadium nung April 29, Honibarnü Fill The Stadium sentong tulu ayongzüktsü lir.

"Asentenshi prokshia aor aser onoki alima tesem ajungalen Tsüngremi mapa inyakba nung shilem aginer," ta odongtari ashi.

"Nisung timba nem Yisu matetdaktsüner. Osangtajung ajanga parnoki Pa mezüing ngutetsü onoki imlar. Parnoki iba asentenshi kidangi bener aotsü aser alima sünga prokshitsü imlar."

Taoba ita Wilmore, Kentucky nung aliba Asbury University nung azünger tem chapel service tembangba sülen maneni külemtsü ajungmesoba ka metet.

Iba sentong ya hopta ana liasü, kong kaketshir meyririjang aika aser campus-i arurtemi asentenshi sentong

ajangshia liasü. Asbury asentenshi sentong ya danga college campus temia prokshia ao aser kaketshir aser dangar temi nikingdang sentong agia liasü.

Ita tetenzüklen Regent University of Virginia Beach, Virginia nung aliba kaketshir tem spring break mapang campus nung adenshia tekulem sentong agi, sarasadem aser takum kuli lemsatapa liasü.

"Asbury nung ama ni iba sentong nunga tanüla tasen ajangshi," ta Regent nung aliba Campus Ministries nung director Jeff Gossmann-i ashi.

"Tsüngremi Gen Z pa dangi anir aruba tejangja liasü. Tashidak wara ajanga Gen Z pur kanga akoksaogo. Iba asentenshi ya ajanga Yisui Gen Z dang 'Ni na angur. Langpangi pelashishia jaoker' ta ashir ama ni amanger."

AO OSHI ANGAZÜKDAK:

TANÜ ANGAZÜKTSÜBA OJANG



Per

(n) juzüa senzüba shiruru (snake)

* Per tapu aika lir.

Perdongsentsü

(n) sünglang nung süngzü mesangtsü atema azüngba süngküm (bamboo pole in outside traditional balcony)

* Perdongsentsü asütsü atema longmi amshir.

OLONG PAITEP # 6460

16x5 grid with numbers 1-17 placed in various cells.

TIPLIN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Allia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6459 TELANGZÜBA

TIPLIN :

- 1. Telunglung, 5. Kaket, 7. Oru,
8. Tenük, 10. Kar, 12. Kisen,
14. Lun, 15. Nashi, 17. Ola,
19. Tasak, 21. Anisüngzük.

LANGTSÜNGLEN :

- 1. Taret, 2. Nok, 3. Nao, 4. Putu,
6. Asüku, 9. Kin, 10. Ken, 11. Anasa,
13. Akok, 16. Inyak, 18. Ain,
20. Sen.



MINISTERBA MANGMANGER :

Department ka nung Ministerba dangi Rs. 2,00,00,000/- indang project ka aru, aser idakji pa nem 17% commission agütsütsü ta shia liasü. 17% nungji kwi adoker, aji metetnüaka Ministerba ongkho nung kanga tashi maitba agi pa indang P/S la jar asüngdang.

Minister : Tatishitsü agi Rs. 2,00,00,000/- nungi ni nü nem 20% agütsü nung nai kwi luzüktsü?

P/S la : Sir, wedding ring aser earring dak alaka ajak luzüktsüa, Sir.

Lilir : WhatsApp

Form for 'Tepela Tasoba Anogo' with fields for name, class, school, and address.

HSLC geography question paper leak masü: Minister Ranøj Pegu

Guwahati, March 18, 2023

(Agencies): Assam Education Minister Ranøj Pegu-i HSLC geography exam question paper leak masü ta metetdaksüogo.

"Assam HSLC Geography question paper ka social media nung prokshibaji 2023 board exam indang masü saka 2021 indang lir" ta Minister Pegu-i ashi.

Iba osang tiyazü prokshirtem merenshitsü aser bangdak ketdangsur dang FIR (First Information Report) benoktsü metetdaksür, ta Minister Pegu-i metetdaksü.

"Assam Matric Geography paper ka belenshiba nung 2023 ta melenshir lir saka serial number ji 2021 board exams indang lir" ta Pegu-isa metetdaksü.

"Taküm class 10 exam tenzükba sülen nungi telok aikati jelia tasa atonger osang tiyazü prokshia arur. Social media-i masü saka SEBA-i tatidang agir. Board-i kuli magütsü tashi

social media nung ashiba osangtem mamangtsü ni kaketshirtem ayongzük" ta pai shisem.

Minister Pegu-isa Twitter nung 2012 indang original geography question paper aser taküm indang ta belenshiba teyanglushiba question paper indang screenshot ana lemsatop.

Ajisüaka iba ajanga terata tali adokogo kechiyong 2021 küm class 10 tatidang magi aser kaketshir nem question papers magütsü.

Covid wara ajanga 2021 küm SEBA kübok class 10 tatidang aser Assam Higher Secondary Education Council (ASHEC) kübok class 12 tatidangtem athi. Iba sülen expert committees anati ashiba nung ajemdaker evaluation process ka ajanga results metetdaksütsü.

"Nisung kari tensa mejungdaksütsü atema High

School Leaving Certificate exam papers leak asür ta tiyazü osang prokshitsü meranger" ta CM Himanta Sarma-ia ashi.

"Assam Police-i iba mapa inyakertem maitsü jangjatsü atema bushisüngdangtsü aser ozüng tapet agi merenshitsü" ta Sarma-isa ashi.

Ajisüaka, SEBA ajanga ketdangsiia agiba HSLC exam nung subject ana question paper leak süogo.

General Science aser Assamese indang question papers temai adokba sülen Assam Education Minister Ranøj Pegu aser SEBA Chairman RC Jain-i anir ketdangsurtem aitsür.

SEBA-i March 30 nü General Science aser April 1 nü MIL tatidang agitsü anogotem melenshiogo.

Külen, social media nung HSLC question paper yanglushiba ka prokshiba atema police-i lanur ka puogo.

Meghalaya HC-i sorkar dang Harijan Colony ken o bentettsü tuyur

Guwahati, March 18, 2023

(Agencies): Meghalaya High Court-i state sorkar dang April ita tsüngda Them Iew Mawlong nungi Harijan Colony nung kibong 342 anientsü atema telemtetba agitsü metetdaksü.

Meghalaya High Court-i telok balala dang taruba ita ana mesüra asem tsüngda kibongtem anientsüsa kümra tembangtsü metetdaksü.

Shillong Municipal Board

(SMB) ali nung aliba kibongtem anientsü indang telangzüba April 10 tashi nung agüjang ta Meghalaya sorkari Harijan Panchayat Committee (HPC) nem mapang züngzükja lir.

"HPC-i sorkar nem telangzüba agütsütsü atema ita asem meshilokba department-i magizük" ta Deputy Chief Minister Sniawbhalang Dhar-i ashi.

September 2022 nug state sorkari HPC nem blueprint ka

agütsü aser iba nung kibong 342 anientsü atema SMB official quarters nung multi-storey flats yanglutsü shia lir.

HPC-i European ward nung kibong 342 shia nem ali 200 square metres agütsütsü aser parnok ki yangluba indang sen menoktsü atema ashi saka ibaji state sorkari magizük.

Iba ken o ya April 24, 2023 nü Meghalaya High Court-i angadangtsü.

Mizoram nung Kuki Chin National Army ka apu

Aizawl, March 18, 2023

(Agencies): Assam Rifles sepaitemi Mizoram kübok Lawngtalai district nung Kuki Chin National Army (KCNA) züngsem ka apu.

Assam Rifles indang Lunglei Battalion-i KCNA telungpurji Bungtlang yimtsüng nung apu.

Pa ya Bangladesh nunger lir aser Bungtlang nung mapang

tatsüka liyonga arurba liasü. Assam Rifles-i pa indang osang tejangja meteta liasü aser iba jagi pa aputsü atema ao ta ketdangsur kati shi.

Parnoki apuba telungpur ya arishi küm 29 tain Faliansang Bawm ta jangjaogo.

Assam Rifles sepaitemisa tawa tu Lawngtalai district nung KCNA telungpur ka puogo.

Bangladesh Army-i KCNA anema mapa inyakba ajanga Bangladesh kübok Chittagong Hill Tracts nungi nisung 500 tema Mizoram kübok Lawngtalai district nung arua jenoka lir.

Kuki-Chin nunger ya Mizo nunger den sendaktepa lir aser yaküm February ita parnoki mezüng Mizoram nung arua jenok.



All Rabha Students' Union (ARSU) den Rabha telok balalai Hokolbar aonung Kenduguri nung aliba ARSU office kima lungkak aitba angur. Constitution indang Sixth Schedule nung Rabha Hasong Autonomous Council (RHAC) dendakjang ta takhangba agüja parnoki lungkak ait. Iba sentong nung ARSU general secretary Pradip Rabha-i anir nisung 500 tema shilem agia liasü. Iba mapang Boko Police-i rally anendaktsü aser aou agi yangluba milenpong rakzük ta lungkak aitertermi ashi. All Rabha Students Union (ARSU), All Rabha Women Council (ARWC), Sixth Schedule Demand Committee (SSDC) aser tanga Rabha teloktemi Sixth Schedule nung RHAC dendaktsütsü takhangba agüja arur.

Khan okadaki orr aliba mapang police temi par ki meita ao



Taoba Pakistan ato kilonser Imran Khan meina gari tem Lahore nungi Islamabad leni aodang tangokba noksa nung angur. Khan aputsü totuyuba agüja aliba Pakistan nung court kati Hokulbarnü agientsü, anungji pa mepui Islamabad nung ochimashi ken o jembitsü aotsü mela.

Islamabad, Metsüremi/ March 18 (Agencies):

Taoba Pakistan Ato Kilonser Imran Khan linük yimtiba Islamabad nung okadak nokdatsü atema orr aliba mapang police temi Lahore nung par ki meita ao. "State gift" ken o dak sendakba nung Khan ya okadaki jaoka liasü. Pa Lahore toktsü aoba sülen mapang tatsüka dang lir Punjab province yimtiba Lahore indang police-i par ki meita ao.

Pakistan Tehreek-e-Insaf (PTI) party tekolakba Khan-i par ki meita aoba ya aitsüogo aser ashiba agi, kidang pa kinungtsü Bushra Begum kija aliba mapang nung police temi par ki meita ao.

"Bushra Begum kija kidang aliba mapang Punjab police-i Zaman Park nung ozü ki rakpoka atu. Koba temzüng ozüng kübok parnok inyaksangshir? Iba ya linük nungi jena orr alisang Nawaz Sharif tanaben tashi dangi anir arutsü atema London nung sentong yangluba nung shilem ka lir," ta Khan-i tweet asü.

Khan okadaki maoba janga police temi anogo ishika tsüingda par ki ananü tashi meita aotsü asoshi sentong yanglur inyaksangshiba sülen pa Islamabad nung oakdak nokdaksü atema lenmang lapokja liasü.

Lahore nungi video ajanga

PTI züngsemtem den mapang tatsüka mangatettep adokba sülen police temi Honibarnü Khan'er kima kishi nongpoka atuba nguogo. Par party-i tweet asüba nung police temi PTI züngsemtem dak sung agi azükba sayuogo.

Islamabad nung lower court-i Khan aputsü atema tetuyuba agütsüba ya Pakistan Election Commission-i benokba ken o ka nung telangzüba agütsütsü atema okadak menokdakba dak sendakba lir.

2018 nungi 2022 tashi Ato Kilonser mapa bener aliba mapang sempet agizükba mesüra item sempettem ayokba nungi sen aazükba mesangdongba atema EC-i pa aija liasü.

Khan-i iba taitsüba ya magizük aser iba ya yimden yimsüsüba dak sendaka lir, ta ashi.

Hokolbarnü Islamabad High Court-i pa aputsü tetuyuba agütsür aliba agientsü aser Khan dang kechi südir süaka okadak nokdaksü tetuyuba agüja liasü.

Taoba PM-i ashiba agi, taküm election nung pa shilem magidaksütsü atema ketdangsürtemi pa aputsü meranger.

Honibarnü Islamabad-i aoba mapang tweet ka ajanga PTI tekolakba yagi ashiba agi, sorkari pa aputsü sentong lir.

"Parnok tasa tamajung meteta liaka ni Islamabad aser

okadaki aor kechiyong ni temzüng ozüng dak tamang akar. Ajisüaka item nisungtem idang tebilemba ya ajaki jangja alitsü nüngdaker. Tang Lahore nung inyakyim ajak tejangja kümogo aser ni ken o ka nung okadak nokdaksütsü atema masü saka ozü party election nüboyimba sentong nung ni shilem magidaksütsü asoshi ni tepuokdaki yoktsü asoshi lir ta jangjaogo," ta pai tweet asü.

Honibarnüsa Khan-i ashiba agi, pa pura par party anitsü atema pai committee ka tentetsüogo.

"Ni tepuokdaki yokra mesüra kodang yokdir, iba sülen party dak sendakba nung telemteba agitsü atema ni committee ka tentetsüogo," ta Arishi küm 70 tain yimden yimsüsür yagi Islamabad-i mao tsüingda Lahore nung par kidang osangbenertem den sensaksema mapang ashi.

Paisa, pa anema ken o 94 benoka lir, ta ashi.

Taoba küm Parliament nung vote agitepba office nungi aginba sülen Khan anema ken o balala benok tenzüka liasü. Iba sülen pai election agitsü atema khanga arudar aser linük ajunga nung longkak aitba rally tem ayongzüka agia arudar. Kasa mapang nung taoba küm pa tepsettsü meranga injang khaloktsü aser iba lendong nung pa yirua liasü.

Equatorial Guinea nung Marburg virus pokteta lir

Malabo, Metsüremi/March 18 (Agencies): Nisung toku asüba sülen Equatorial Guinea nung Marburg virus poktetba jangjaogo, ta World Health Organisation (WHO) ajanga Hombarnü ashi, koba Ebola den mesüktepa kanga mela menatepa aor aser nisung asür.

Central Africa nung iba linük tila nungya Kie-Nt em province nung mejangjaba haemorrhagic fever putetba sülen taoba hopta nisung 200 dak tema quarantine asü aser senzusempongba nokdanga lir.

"Equatorial Guinean ketdangsür temi kanga kera tashidak putetba, kera

telangzüba agütsüba atema pelar," ta Dr Matshidiso Moeti, WHO regional director for Africa ajanga sangdong ka nung ashi.

Nisung toku asüba den külemi Marburg virus alitsü temolung melemtemi cases 16 lir, aser parnok dak temang metaba, mangmangba, azü dena saksüba aser tepok aoba lir, ta WHO ajanga ashi.

Marburg virus tashidak agi meneper ya noklang nung shilem 88 tashi asür, ta WHO ajanga ashir. Iba tashidak atema vaccine mesüra antiviral treatment mali.

Nisung asüba ya Kie-Ntem

province kübok Nsok-Nsomo district nung asüpila sentong ka den sendaktepa lir, ta Equatorial Guinea health minister Mitoha Ondo'o Ayekaba-i Hokulbarnü ashi.

Yangji aliba health ketdangsür temo mejangjaba shirang ka ajanga haemorrhagic fever adokdaksüba osang February ita osang agütsü aser sample tem Senegal nung aliba laboratory dangi yoka yangji Marburg virus ya jangjateta liasü, ta WHO ajanga ashi.

Parnoki tsüingsü pua aor aser temolung melemi alirtem balaka anidena anepalur, ta ashi.

TENÜNGSANG AGÜTSÜR

Mopungchuket Senso Telongjem (MSTK) aser Ao Temulungtsür Telongjem (ATTK) Kohima ajanga Senso tajungtemi pei inyakba mapa nung temaba jenjang ajangzüktetba aser takok ngutetba asoshi tenüngsang tetushi agütsür.

1. **Shri. A. Temjen Jamir** promoted to Director under the Department of Industries and Commerce.
2. **Shri. L. Tali Jamir** promoted to SDEO under Department of School Education.
3. **Dr. Arensenla Jamir** on being conferred Doctorate for her thesis title "A Christian Ethical Appraisal of the Ao Naga Ecclesiology in conversation with Emmanuel Levinas "Otherness" from the United Theological College, Bangalore. Senate of Serampore University.

Iba takok tulu ya tarutsü lanurtem asoshi tatishitsü tajung aser nenok tenzüka wadang nung Naga nunger asoshi temoatsü südakjangma. Tsüingremi nenok taküm ano maneni moajang ta sarasademtsür.

Sd/- Nungsangwapang President, MSTK

Sd/- Ayimpongla President, ATTK

US den raratsü lanur 800,000 renema lir: North Korea

Pyongyang, Metsüremi/ March 18 (Agencies): United States aser tanga tsükchirtem den raratsü atema military service asoshi lanur 800,000 shi-i volunteer süogo, ta North Korea linük indang state osang kaket Rodong Sinnum-i sangdong ka ajanga metetdaksü.

Volunteer temi North Korea indang tsükchirtem ajak meshimshia samatsütsü aser Korea ana longjemdaksütsü asoshi tenangzüka agütsüogo. Item lanurtem ya military nung adentsü aser tanaben denshitsu atema state-i Hokolbarnü ayongzüka sentong nung shilem agia liasü. Kasa osang ajanga lanurtemi pei tenüng züngoksemtsü atema tesem balala nung tarensena nokdaker aliba noksa sayuogo.

"Kaketshir aser mapa inyaker 800,000 shi tejakdangi aruogo aser linük kümzüka ayutsü aser tsükchirtem raksatsütsü atema parnoki rara nung shilem aginer," ta Rondong Sinnum-i Honibarnü sangdong ka ajanga metetdaksüba NK News-i sangdonga liasü.

NK News sangdong ajanga ashiba agi, North Korea nüjiso, nüburtem alitsü temeden aser terenlok raksatsütsü meranga US aser South Korea nati parnok rongmesoa inyaksangshiba ajanga item lanurtem yagi telangzüba agüja liasü.

Lanurtem ya onok indang "socialist fatherland" aitoktsü merangertem taochi makai

samatsütsü atema mulungteter lir, ta Rondong Sinnum-isa metetdaksü.

North Korea-i Hwasong-17 intercontinental ballistic missile (ICBM) tendangba sülen anogo ka lir Hokolbarnü iba inyakyim ya achayanga inyakogo.

North-i ashiba agi, US aser South Korea nati military drills ayongzüka agiba atema telangzüba agütsütsü asoshi Hwasong-17 tendangogo. Iba exercise ya Pyongyang-i, North amaktsü atema Washington aser Seoul na renemshiba ka ama züngshir.

South Korea aser US nati "Freedom Shield 23" ta nüngja agütsür anogo 11 joint military drills agitsü asoshi Hombarnü tenzüko.

Brehostibarnü Japan Ato Kilonser den senden ka amentsü atema South Korea tir Tokyo-i aoba sülen mapang tatsüka dang lir Hwasong ICBM ya tendanga liasü. North Korea-i amokmerenba telangzüba agütsütsü asoshi Seoul aser Tokyo na sendaktepa inyaksü asoshi sensaksemtü atema South Korea tir-i Japan semdanga liasü.

South Korea tir Yoon Suk-yeol aser Japan PM Fumio Kishida na Tokyo nung senden amenba ya küm 12 tsüingda South Korea tir kati Japan mezüngbuba semdangba liasü. Taoba ita ishiak tsüingda North-i ballistic missile aser tanga hadir balala tendangba mapang ka nung tang South tir-i Japan semdangogo.



Avdiivka, Ukraine nung Russia nungeri tayimtsü amshia amakba sülen multi-store ki ka mokozü adoka arongba noksa nung angur.

Naga Wrestling championship takok nung tembangogo

Dimapur, Metsüremi/ March 18 (TYO): Nagaland Deputy Chief Minister aser Planning and Transformation, National Highway In-charge, TR Zeliang-i ashiba agi, Kohima district kübok Tsiesema nung world class wrestling stadium ka yanglutsü atema sorkari sen crore 50 intoktsü agizükogo.

State Stadium, Dimapur nung 14buba Naga Wrestling & First Belt Wrestling Championship 2023 shibangba sentong nung o jembiba mapang Zeliang-i, sorkari ali acre 14 mekazükogo aser iba indoor stadium nung kilong nung asayaba saisapong balala aika asayatetsü, ta ashi.

Paisa, sorkari Youth Resource and Sports department ajanga annual grants in aid agüja association nem maneni teyari agüja

arudar aser iba den India tenüng nung bendanglen oa asayaba mapang logistic aser senotsü teyari agütsüdar, ta ashi.

Iba asayamung koba tang mezüngbuba Kohima district adena orr asayar, iba ya wrestling association unit tem telongjem tali tashi itdaksütsü atema dang masü saka Naga nungertem longjemdaksütsü atema lir. Iba ajanga tetsü tebou mapang nungi asaya aruba asaya ka angazüksü aser reprangtsü atema maongka agütsütsü, ta pai ashi.

Maneni Deputy Chief Minister-i ashiba agi, Naga nungertem longjemmer ka ama tejakleni merayonga aotsü mapang tongja tongogo. Paisa, state terenlok atema tejakdangi aotsü atema iba asayamung ajanga asen nüburttem ajungmesotsü, ta

amangba lemsatepa liasü.

Nisung ka lenla ajak nung renlokyonga aotsü atema saisapong yagi tongtibang shilem agir. Education system tajung kaji shisatsü renlokdaksütsüba kija dak amendaker mali saka shi temang terenlok daka rangloker alir, ta shia pai lanurtem dang saisapong ya pei taküm nung tongibang shilem ka kümdaksütsü ajungshi, kechiyong iba ajanga saisapong lima tasen ka dangi anitsü, ta shisem.

Iba asayamung nung Ao, Lotha, Sema aser tanga lokti nungi asayar kaka densema nisung 56-i shilem agia liasü.

Asayamung ya Zeliang Wrestling Association aser Kuda Villge Council, Dimapur na den longjemmer Naga Wrestling Association-i ayongzüka asaya liasü.

Mkg Town Inter-Ward Football Tournament April 10 nungi asayatsü

Mokokchung, March 18, 2023 (TYO): 4 buba Mokokchung Town Inter-Ward Football Tournament 2023 taruba April ita 10-21 tashi yangi Imkongmeren Sports Complex, Mokokchung nung asayatsü lemtetogo, ta Organizing Committee Convener, Bendangnükshi-i sangdong ka ajanga metetdaksüogö.

Taküma iba asayamung marok shir ward-i bendir champion nem senpet sen 50,000/- aser runner-up nem sen 30,000/- senpetsütsü. Iba den külemi nija senpeta kar

agütsütsü, ta tayongertemisa metetdaksü. Iba asayamung ya Mokokchung town nung lanur football janrar nem sabang lapokja ajungketttsütsü nükla yur kümshi Marepkong Youth Association-i ayongzüker.

Tejanrar ward-tem atema registration maparenji 20th March nungi 2nd April, 2023 tashi Mokokchung Municipal Council (MMC) Shopping Complex, Shop No. 48 nung inyaksü. Iba asayamung dak sentakba indang osang tali jangjanüra, item number nung jembitsü akok - 9862429483/ 9856512399/9862466561.

Crystal Palace-i head coach Patrick Vieira mapa nungi anentsü



Metsüremi/March 18, 2023 (Agencies): Crystal Palace pur Premier League relegation zone-i aitsüsa jenjang kati aiba sülen head coach Patrick Vieira mapa nungi anentsüogö.

Team 20 asayaba league nung Palace pur tang jenjang 12buba nung lir ajisüaka parnok ponglang nung aliba Southampton team dang nungi point pongu agi dang timba lir.

Palace pur league nung asaya asem atonga tamakok nguogo aser 2023 küm tang tashi nung takok ka danga ngua mali.

"Iba telemtetba tasak agiba atema sasasetta bilemer," ta Palace mendenbuba Steve Parish-i ashi. "Ita tsüngda result majungba ajanga onok league nung jenjang mejungi kümogö aser Premier League nung maneni asayatsü atema temelenshi ka nüngdaker ta bilemer."

Palace-isa, Vieira melentsüpur bushi tenzükogo, ta ashi.

Taoba mapang Arsenal midfielder Vieira ya 2021 küm shimba sülen pai ita 20 iba mapa benogo. Pa kübok coaching staff Osian Roberts, Kristian Wilson aser Saïd Aïgoun

nungeria parnok mapa toktsüogö.

Bodhbarnü Brighton pur goal 1-0 agi makokba sülen Vieira mapa nungi anentsütsü atema telemtetba agia liasü, kechiyong parnok iba season PL nung tia mejangjai kümadak.

December 13 nü league nung Bournemouth pur akokba sülen Palace puri tang tashi nung tetoktepba ajak nung asaya ka danga koka mali. Iba asaya akokba sülen parnok asaya 12 nung teneben tamakok angu aser pongu ben draw süa liasü.

League nung ponglanglen kanga toktepa asayar asünung Palace pur relegation zone-i point asem agi dang mai lir.

Vieira lenisüba nung taoba season Palace pur jenjang 12buba nung tembang aser FA Cup semifinals tonga asaya liasü.

"2021 küm club nung adenba sülen Patrick-i temelenshi aika bener arutsüogö aser ni aser pa den külemi inyakertemi pa temaba jenjang nung züngshir. Patric-i club atema takokba tashi inyakogö aser onok ajaki pa aser par team dang kanga pelar," ta Parish-i ashi.

Women's WBC: Nitu, Preeti, Manju Pre-quarters-i iogo

Metsüremi/March 18, 2023 (Agencies): Women's World Championships nung India tsürtemi maneni kanga junga asaya Honibarnü parnok asem tashi pre-quarters-i iogo.

Commonwealth Games gold medallist Nitu Ganghas (48kg)-i RSC agi Korea tsür Doyeon Kang akok aser Preeti (54kg)-i 4-3 ta split decision agi Romania tsür Lacramioara Perijoc madak takok ngua liasü.

Kasa mapang nung Manju Bamboriya (66kg)-i New Zealand tsür Cara Wharerau 5-0 agi ayong ayonga kokogö.

Nitu shiba iba asayamung nung taoba mapang quarter-final nung tsüka liasü, lai iba asayamung kanga junga tenzük aser mezüngbuba asaya mezüngbuba round nung kokatok.

Asaya tenzükli lai hook aser left cross amshia asaya saka la indang jab tem agi metsüngshi-i liasü.

Iba sülen boxer anaprongla yagi teka anaprongla kati ka dang atsüng tenzük aser Kang laoa liasü.

Nitu-i maneni Korea nung asayar dak ya taochi makai atsüng aser second 20 dang lir tanabenbuba laoadok aser Italy nung referee Luca Vadilonga-i asaya anendakja India tsürla nem ya takok agüja liasü.

Mezüngbuba RSC verdict agi akokba sülen Preeti tanabuba asaya nungbo kanga meranga asayatsüsa aküm.

Perijoc den asayaba mapang tenapronglai asaya kanga kümdanga tenzük. Mapang tatsüka dang lir Perijoc-i straight jab ka

atsüngba agi Preeti dak kongshi, ajisüaka Haryana tsürla ya yakta dang asüngsashia liasü.

2022 Asian Championships bronze medallist yagi Romani tsürla dak ya anaben kanga junga tsüngshi aser mezüngbuba round nung la 3-2 agi tejakdang liasü.

Tanabuba round nung boxer anapronglai takok tashi pila asayatsü merang aser Perijoc-i temang nung atsüngtsü meranga liasü. Preeti-i kanga yakyaka jenshitsü merang ajisüaka lai iba round 2-3 agi makok.

Tatembangbuba round ya draw asü aser tanaben asadangshitsüsa aküm. Evaluator aser observer temi asadangshiba sülen India tsürla nem ya takok agüja liasü.

Novak US-i aitsü atema temelaba magütsü

Metsüremi/March 18, 2023 (Agencies): COVID-19 vaccine magiaka US-i aitsü asoshi temelaba ka meshiba magizükba sülen Novak Djokovic taruba hopta asayatsü aliba Miami Open nung shilem magitettsü, ta tournament director James Blake-i ashi.

Bendanger senzisenpongertem US-i aitsü atema COVID-19 vaccine agir alitsü nüngdaker, ajisüaka linüki aitsü atema temelaba ka angutsü asoshi Djokovic-i imla liasü.

Sorkari COVID-19 emergency sangdong May 11 nü aginba sülen iba inyakyim ya agintsü imlar.

Asayamung ayongertemi ashiba agi, pa nem temelaba agütsüdaksütsü asoshi takokba tashi merangdangogö. Grand



Slam 22 tashi koker aliba asayar ya Indian Wells Open nunga kasa timtem ajanga masayatetsüsa aküm.

"Novak Djokovic nem temelaba agütsüdaksütsü asoshi takokba tashi inyakdangogö, ajisüaka matalok," ta Blake-i Tennis Channel dang Hokolbarnü ashi.

"Iba asayamung ya alima nung asayamung tongtibangtem rongnung ka lir aser onoki

asayar tajungtibatem asayadaksüner. Onoki akokba tashi inyakdangogö. Onoki sorkar den jembishinütsü merang, saka iba ya onok kabuma nung mali," ta paisa ashi.

Djokovic shiba COVID vaccine magiba ajanga taoba küm Australia nungi meyipa yoka Australian Open nung masayatet, pai vaccine agitsü melenbo pa Grand Slams nungang shilem magitsü ta shiogo.

Florida Governor Ron DeSantis aser state nungi US senators anapronglai Biden administration dang iba asayamung nung toktepdaksütsü asoshi world number one asayar Djokovic nem temelaba agütsütsü atema asüngdanga liasü.

BILEMDANGANG
"Anema alitsü atema taküm libaliro melenshitsü nüngdaker."